

तीतुस क पत्र

1 पौलुस कईंती स जेका परमेस्सर क चुना भआ प्रेरित लोगन क ओनका बिसवास में सहायता देइ क बरे अउर हमरे धरम क सच्चाई क पूरा गियान क रहनुमाई क बरे भेजा गवा बा, इ सब, लोगन क परमेस्सर की सेवा क मार्ग बताइ। 2उ मई अइसेन एह बरे करत हउं कि परमेस्सर क चुने हुअन क अनन्त जीवन क आस बाँधइ। परमेस्सर, जउन कभउं झूठ नाहीं बोलत, अनादि काल स अनन्त जीवन क बचन दिहे अहइ। 3उचिते समइ पइ परमेस्सर अपने सुसमाचार क संसार क जानकारी बरे परगट किहेस। उहइ संदेस हमार उद्धारकर्ता परमेस्सर क आज्ञा स मोका सऊँपा गवा बा।

4हमार समान बिसवास में मोर सच्चा बेटवा तीतुस क: हमरे परमपिता परमेस्सर अउर उद्धारकर्ता मसीह ईसू कईंती स अनुग्रह अउर सात्ति मिलइ।

क्रीत में तीतुस क काम

5मई तोहे सबन क क्रीत में एह बरे छोड़ रहेउं कि उहाँ कछू अधूरा रही गवा बा, तू ओका ठीकठाक कइ द्या अउर मोरे आदेस क अनुसार हर नगर में बुजुर्गन क नियुक्त करा। 6बुजुर्ग क नियुक्त तबहि कीन्ह जाइ जब उ निर्दोस होइ। एक पत्नी ब्रती होइ। ओकर बचवन बिसवासी होई अउर अनुसासनहीनता क दोस ओनपर न लगावा जाइ सकइ। अउर उ पचे निरकुंस भी न होई। 7निरीच्छक क निर्दोस अउर कउनउ खराबी स अछूता होइ चाही। काहेकि जेका परमेस्सर क काम सऊँपा गवा बा, ओका अडियल, चिड़चिड़ा, बहुत जियादा मदिरा पियइवाला, झगड़ालू, नीच कमाई क लोलुप न होइ चाही। 8बल्कि ओका तउ अतिथियन क आवभगत करइवाला, नेकी क चाहइवाला, विवेक स भरा, धर्मी, भगत, अउर अपने प नियन्त्रण रखइवाला होइ चाही। 9ओका ओह बिसवास करइ जोग्ग संदेसा क मजबूती स धारण किहे रहइ चाही जेकर ओका सिच्छा दीन्ह गइ अहइ, ताकि उ लोगन क सदसिच्छा दइके ओन्हे प्रबोधित कइ सकइ। अउर जउन एनकर विरोधी होई, ओनकर खण्डन कइ सकइ।

10इ एह बरे इ बहुत जरूरी बा काहेकि उ सबइ बहुत अहई अउर उ पचे उपद्रवी होइके व्यर्थ क बात बनावत भए दुसरन क भटकावत हीं। मई विसेसरूप स गैर यहूदियन पृष्ठभूमि क लोगन क उल्लेख करत हउं। 11ओनकर तउ मुँह बन्द कीन्ह देइ जाइ चाही। काहेकि उ पचे जउन बातन नाहीं सिखावइ क बाटिन, ओन्हे सिखावत भए घर बिगाड़त रहत हीं। खराब रस्तन स धन कमाइ क बरे ही ओ अइसेन करत हीं। 12एक क्रीत क नबियन त अपने लोगन क बारे

में खुद कहे बाटइ: “क्रीत क निवासी हमेसा झूठ बोलत हीं, उ पचे जंगली पसु अहई, उ सबइ आलसी बाटेन, पेटू अहई।” 13इ कथन सही बा, इही बरे ओनका बलपूर्वक डौंटा-फटकारा ताकि उ सत्य बिसवास क अनुसरण कइ सकइ। 14यहूदियन क पुरान कथनन अउर ओन्हन लोगन क हुकुमन पइ, जउन सत्य स भटक गवा हयेन, कउनउ धियान न द्या। 15पवित्तर लोगन क बरे सब कछू पवित्तर बाटइ, मुला जउन पापे स असुद्ध अहई अउर जेनमाँ बिसवास नाहीं बा, ओनके बरे कछू भी पवित्तर नाहीं बा। वरन ओनकर मन अउर विवेक दुइनो हीं असुद्ध अहई। 16उ पचे परमेस्सर क जानइ क दावा करत हीं। मुला ओनकर करम दर्सावत हीं कि ओ पचे ओका जनबइ नाहीं करतेन। उ पचे घृणित अउर आज्ञा क उल्लंघन करइवाला अहई। अउर कउनउ अच्छा काम क करइ में उ असमर्थ अहई।

सच्ची सिच्छा क अनुसरण

2 मुला तू हमेसा अइसेन बात बोला करा जउन सदसिच्छा क अनुकूल होई। 2बूढ़े मनइयन क उपदेस द्या कि उ सालीन अउर अपने प नियन्त्रण रखइवाला बनई। उ पचे गंभीर, विवेकी, पिरेम अउर सत्य सिच्छा क अनुसरण करइवाला होई, अउर धीरज सहित सहनशील होई।

3इही तरह बुढ़िया स्त्रियन क सिखावा कि उ पचे पवित्तर जनन क जोग्ग अच्छा व्यवहारवाली बनई। निन्दक न बनई अउर बहुत जियादा मदिरा पान क लत ओनका न होइ। उ अच्छी-अच्छी बातन सिखावइवाल बनई जेहि का उ पचे खुद पालन किए अहई। 4ताकि युवतियन क अपने-अपने बचवन अउर पतियन स पिरेम करइ क सीख देइ सकई। 5जेहसे उ पचे संयमी, पवित्तर, अपने-अपने घरन क देखभाल करइवाली, दयालु, अपने पतियन की आज्ञा मानइवाली बनई। जेका परमेस्सर क बचन क निन्दा न होइ।

6इही तरह जवानन क सिखावत रहा कि उ सबइ संयमी बनई। 7तू अपने आप क अच्छे कामन का उदाहरण बनाव। तोहार उपदेस सुद्ध अउर गम्भीर होइ चाही। 8अइसेन सद्वानी क प्रयोग करा, जेकर आलोचना न कीन्ह जाइ सकइ ताकि तोहार विरोधी लज्जित होई काहेकि ओनके लगे तोहरे विरोध में खराब कहइ क कछू नाहीं होइ। 9दासन क सिखावा कि उ सब बात में अपने स्वामियन क आज्ञा क पालन करई। ओन्हे प्रसन्न करत रहई। उलट कर बात न बोलई। 10चोरी चालाकी न करई। बल्कि सभन बिसवासनीयता क प्रदर्शन करई। ताकि हमार उद्धारकर्ता परमेस्सर क उपदेस क सब तरह स सोभा बड़इ।

11काहेकि परमेस्सर क अनुग्रह सब मनइयन क उद्धार करइ बरे परगट भवा बा। 12एहसे हम सीख मिलत ह कि हम परमेस्सर विहीनता क न नकारी अउर संसारिक इच्छन क निसेध करत-करत अइसेन जीवन जिई। जउन विवेक स भरा नेक, भक्ति स भरपूर अउर पवित्तर होइ। आज क एह संसार में 13आसा क ओह धन्य दिन क परिपूर्ण करइ क बाट जोहत रही। जब हमार परम परमेस्सर अउर उद्धारकर्ता ईसू मसीह क महिमा परगट होई।

14उ हमरे बरे अपने आपके दइ डाएस। ताकि उ सब तरह क दुस्तन स हमका बचाइ सकी अउर आपन चुने भए लोगन क रूप में अपने बरे हमका सुद्ध कइ ले हमका, जउन अच्छा काम करइ क लालयित अहइ। 15इन बातन क पूरे अधिकार क साथ कहत अउर समझावत रहा, उत्साहित करत रहा अउर विरोधियन क झिड़कत रहा। ताकि कोई तोहार अनसुनी न कइ सकइ।

जीवन क उत्तिम रीति

3 लोगन क याद देवोंवत रहा कि उ पचे राजा लोग अउर अधिकारियन क अधिन रहईं। ओनके आज्ञा क पालन करईं। सब तरह क उत्तिम कामन क करइ क बरे तइयार रहईं। 2कीहीउ क निन्दा न करईं। सान्ति-पिरेम क साथ सभी लोगन स मिलकर रहईं। अउर सज्जन बनईं। सब लोगन क साथे नरम व्यवहार करईं।

3इ मईं एह बरे बतावत हउं काहेकि हम हूँ, एक समइ रहा, जब मूर्ख रहे। आज्ञा क उल्लंघन करत रहे। भ्रम में पड़ा रहे। अउर सबइ वासना अउर सब तरह क सुख-भोग क दास बना रहे। हम स लोग घिना करत ही। अउर हम भी परस्पर एक दूसरन स दुस्तता अउर इर्सा करत रहेन। हम पचन स लोग घिना करत रहेन अउर हम पचे भी ओनसे घिना करत रहेन। 4मुला जब हमार उद्धारकर्ता परमेस्सर क मानवता क बरे दया अउर पिरेम परगट भवा 5उ हमार उद्धार किहेस। इ हमार निर्दोस ठहराइ जाइके बरे हमार कीहीउ काम द्वारा नाहीं भवा बल्कि ओकरी करुणा द्वारा भवा। उ हमार रच्छा ओह स्नान क द्वारा किहेस जेहमाँ

हम फिन पइदा होइत ह अउर पवित्तर आतिमा क द्वारा नवा बनावा जात अहीं। 6उ हम प पवित्तर आतिमा क हमार उद्धारकर्ता ईसू मसीह क द्वारा भरपूर उँडरे बा। 7अब परमेस्सर हमका आपन करुणा क द्वारा निर्दोस ठहराए बा ताकि जेकर हम आसा करत रहेन ओह अनन्त जीवन क उत्तराधिकार क पाइ सकी। 8इ कथन बिसवास करइ क जोगग बा।

अउर मईं चाहत हउं कि तू पचे इन बातन पर डटा रहा ताकि उ पचे जउन परमेस्सर में बिसवास करत हीं, अच्छा कामन में लगा रहईं। इ बातन लोगन बरे उत्तिम अउर हितकारी बाटिन।

9बंसावली सबन्धी विवादन, व्यवस्था सम्बन्धी झगड़ा-झमेलन अउर मूर्खता भरा मतभेदन स बचा रहअ काहेकि ओनसे कउनउ लाभ नाहीं उ सबइ बेकार अहईं। 10जउन आदमी फूट डालत होइ, ओसे एक या दुइ बार चेतावनी देइके अलग होइ जा। 11काहेकि तू जानत अहा कि अइसा मनई रस्ता स भटक गवा बा अउर पापन क करत बाटइ। उ तउ खुद अपने क दोसी ठहराए बाटइ।

याद रखइ क कछू बातन

12मईं तोहरे लगे जब अरतिमास या तुखिकुस क भेजउं तउ मोरे लगे निकुपुलिस आवइ क भरपूर जतन करा काहे कि हम उहइ सर्दी बितावइ क निश्चय कइ रखेउ ह। 13वकील जेनास अउर अपुल्लोस क ओनकी जात्रा क बरे जउन कछू आवश्यक होइ, ओकरे बरे तू भरपूर सहायता जुटाइ दया ताकि ओन्हे कउनउ बात क कउनो कमी न रहइ। 14हमरे लोगन क सतकर्मन में लगा रहब सीखइ चाही। ओहमाँ स भी जेनका बहुत जियादा जरूरत होइ, ओका पूरा करब ताकि उ पचे विफल न होईं।

15जउन मोरे साथे अहइ, ओ सब क तोहे नमस्कार। हमरे बिसवास क कारण जउन लोग हमसे पिरेम करत हीं, ओन्हेऊ नमस्कार।

परमेस्सर क अनुग्रह तू सबके साथे रहइ।